

Danas je u Budvi završeno 6. zasjedanje CESEE Inicijative, koju sačinjavaju supervizori osiguranja zemalja Centralne i Jugoistočne Evrope, a čiji je domaćin po prvi put bila Agencija za nadzor osiguranja Crne Gore.

Zasjedanju je prisustvovalo preko 30 učesnika iz 11 zemalja ovog regiona, i to: Albanije, Austrije, Bosne i Hercegovine, Hrvatske, Kosova, Makedonije, Moldavije, Poljske, Slovenije, Srbije i Crne Gore.

Na ovom zasjedanju razmijenjena su praktična iskustva regulatora ovih zemalja na tri teme odabrane za koje je iskazana najveća zainteresovanost učesnika, a koje su i ujedno od značaja u postupcima nadzora nad funkcionisanjem tržišta osiguranja.

Prisutni su razmijenili iskustva o sljedećim pitanjima:

- Podobnost lica biranih na upravljačke funkcije u društvima za osiguranje (izvršni direktor, odbor direktora, idr.) – sa posebnim akcentom na lica čiju je podobnost potrebno procjenjivati, učestalost procjena, najmanje uslove koji moraju biti zadovoljeni, način procjenjivanja i primjenu principa proporcionalnosti u procjeni, kao i praktična pitanja koja se otvaraju u neposrednoj primjeni zakonskih rješenja;
- Sprječavanje pranja novca i finansiranje terorizma – opseg nadležnosti supervizora osiguranja, način kontrole poslovanja obveznika primjene propisa o sprječavanju pranja novca, važnost saradnje regulatora osiguranja sa drugim državnim organima u postupku ovih kontrola, postupanje obveznika u pogledu prikupljanja i obrade podataka kao i podnošenja izvještaja nadležnim organima;
- Uloga spoljnje revizije u nadzoru nad radom osiguravajućih društava – sa osvrtom na način izbora revizorskih kuća, obavezu rotacije revizora, provjeru mišljenja ovlaštenog revizora, eventualne nedostatke u revizorskim izvještajima, kao i važnost visokog kvaliteta revizorskih izvještaja za analizu poslovanja društva za osiguranje.

Zasjedanje je uspješno organizovano na zadovoljstvo svih prisutnih, sa generalnim zaključkom da je ovakvu praksu potrebno nastaviti u budućnosti, dosadašnjom dinamikom polugodišnjih sastanaka.